

四庫全書

集部

欽定四庫全書

本堂集卷五十一

宋 陳著 撰

記

天井山報濟庵記

四明天井山有庵名報濟主僧師錫以記請曰庵建於
宋淳佑間師祖祖詔其嗣文素中遭訟疊有力者乘之
空所有庵幾廢文素誓復其舊而規新益力屋日以闢

具日以備田積至六十畝有奇外有其徒祖可者死捐田數畝庵以託塋所久而其後取以去此其概也余因念於師錫今天下形勝山林中鉢如雲宅之以金碧聲之以鐘鼓朝夕熙恬於四明之外亦云足矣顧欲退然自為一庵計殆未之喻答曰庵吾祖祖詔創之甚勞文素復之甚難師錫寔為之孫負荷之甚重亦曰苟不自力殆棄厥先之遺惟便安之自擇人其謂我何故拳拳以守庵為是以記庵為急非有他也嗟乎浮屠者流稽

天沃日世之人方傾投艷向而乃欲假吾儒天倫之說
家其業而子孫其傳又欲託余之文書庵之始末以詔
方來是亦自有見也不可尚乎余又安得不有感於師
錫之心哉乃為之記前進士陳著記

識全軒記

天台陳行之恕可遊杭為西湖留於錢塘門外折而南
不百武負城築軒坐而面其勝因坡公寄晁美叔詩云
西湖天下景誰能識其全扁曰識全而屬余以記景物

之在天下惟人所取胸中有山則天下無餘山胸中有
水則天下無餘水蓋物於物者不足以見物不物於物
則物無不見子雖家西湖而西湖本不足以家我一開
軒捲簾若迫而寬若近而遠若平接而寔俯臨之子必
有得坡公超出見外之妙因歌以贊其全之識氣之清
而上兮天吾與之為蓋心之寬以平兮地吾與之為載局
於形而不化兮將自同於蠅蚋曠然而達觀兮殆幾收
百衲於破碎吾退然不與之爭兮惟見其物之小而我

大坡仙尚其如見兮其相與神交於湖之表詩之外也
歲柔兆涒灘陬月四明遺耄陳著記

婺州浦江縣龍德寺記

龍德寺舊名乾元宋祥符戊申改今名其地南則溪而
江而山如揖如抱北則仙姑巖伏龍二十里而昂其首
冠之以塔塔有院院之前即寺寺始於邑人陳公譽捨
墓與田碑壞失其歲月爾後隨經隨營由山門而廊而
殿而堂與凡寺之重且要之屋咸具嘉定辛巳僧坦奏

請金書寺額及桂堂扁而寺以重塔始於天聖乙丑胡
貳卿則捐銀五十萬緡創造公譽且樂助其成中遭寇
燬邑人朱氏與僧某修出力重建至寶祐甲寅僧文豪
重脩久而僧文啟率其徒妙資文富文廣元悟與公譽
之後今岳教公舉又大脩之梯其層而升高闌其廉而
護險丹雘金碧而後其繪事邑人婁榮孫凌蘭吳幼敏
隨施有差而朱君章捐銀以飾其表於是建圓通閣榜
曰多寶佛塔小山門榜曰龍峰塔院自至元癸巳迄元

貞乙未畢岳教又捐田歲累所入以待續用而塔以備
塔院與寺昔為二今合為一為教門甲乙住持有田一
千五百餘畝衆日不下千指規模寬衍氣勢聯絡鐘魚
齋粥如時寔浦江甲刹妙資不遠千里狀且圖來請記
余辭焉越兩載請益固乃閱狀按圖而書之併及余之
所欲言吁世之四民之家莫不欲為子孫久遠地或不
旋踵簠不自振滔滔也而過者誰顧浮屠氏宮居粒食
一有未辦則旁詢側睨咨嗟太息相先扶植不極則不

止夫以寺之徒竭其力為寺之計分也邑之豪斥其有
餘應接緣募流俗之情也至於達官臚仕祿廩之所儉
積章甫縫掖齏鹽之所苦節亦皆歡喜傾倒以相其後
此豈偶然之故要必自有以動其中而莫之外耶數百
年間屋與塔屢廢而屢脩至此而益以展拓益以壯觀
山川井邑之形勝寺則擅之矣亦曰人也有時焉彼教
之盛極於今日豈特此寺也哉余故備書其始末庶後
之觀世道者有考與前進士四明陳著記

新升奉化州記

黃唐疆理天下至周之職方而大備降而秦而郡縣之
隨時沿革勢也元貞改元朝廷以諸縣地廣民稠者升
而州中下其等明之奉化為戶四萬而羸州為下官視
州設員五宣授者二勅授者三明年月正元日達嚕噶
齊察罕公知州事李公炳同知星公榮判官趙公秉李
公居安各以其職視事余與學宮諸生旅賀於庭揖余
而語之曰州為路附庸壤地褊小猶故邑也為民社而

重其任盡廣咨焉以求所稱古者問政必於其耄幸毋
隱於我余謂吾夫子之言為政道之以德齊之以禮有
恥且格孟子曰善政不如善教之得民也聖賢格言如
日月如金石斷斷乎不可易教化者獄訟徭賦末也蓋
教化行則習俗美獄訟將自簡而徭賦又易易耳夫然
則吾事畢矣况仕也以義方六七十如五六十皆可行
志叢爾之魯有周禮在雖齊之大莫能抗蜀雖僻遠文
翁以學化之當時至以齊魯比為地小不足回旋儒術

近於迂濶可乎况茲邑之舊諸先生典刑之遺章甫縫掖甲於一路皆僚分而自重農工商賈之家畏法而專業循循然惟長民者所休戚薰之以詩書浹之以禮義教亦政也和平而不流於弱簡易而不失之疎政亦教也三代而上之化民亦若是而已此之謂知本於從政乎何有咸曰善是吾心也其以是刺之石

州為下之下改云官視州設七明年月正元日宣授達嚕噶齊察罕公知州事李公炳勅授同知星

公祭判官趙公秉李公居安省授吏目臧滑鄭元均各以其職視事既而以記屬余謂吾夫子之言以下如前

慶元路治中貝降奉議德政記

明故東南大藩事任非輕自昔選用賢良為首為貳有以福澤其民民亦義於必報紀去思頌遺愛多矣今奉議大夫貝降公自至元壬辰來領郡治中事閱數年間郡以材望叢委休稱籍籍秩滿行有日士庶送者祖帳

載道猶曰未也且將勒碑詔永久謂余山林樸直於鄉
閭年又最高狀其實以示曰公之於從事也剖滯訟則
人稱其平董倉儲則戶樂其寬鹽海之征兵革之需受
給所惠皆不動聲色更不能為私民不以為病闕決之
地固曰有職分在然公之始也會朝廷有問罪島蠻之
役治艤艘練甲兵峙糗糧身任其難而從容暇豫一無
不辦亦曰軍旅之事明習有素分一郡憂責有餘材也
至於歲甲午憂民苦艱食市無千斛大家無蓋藏郡無

發粟舊址公惻然以奮曰赤子垂為溝中瘠撫字謂何
亟啟長吏馳詣省府白之得請出粟四萬石平其價隨
處所便其糴醵菜色轉而歌舞公之施者千里如一今
年夏無麥饑尤甚公時適留省府授比以請民以不饑
樂及秋熟振糴有規天時不可必而郡民無凶歲之虞
可以百世矣余嘗謂三代以上人物淳厚施於有政形
迹泯然功用自大世降而吏治日以苟間有事涯岸出
鋒鏑以聲名自負而非元氣之福此余於公深有感焉

忠實之中精神流行涉歷之久知慮詳練不施勞不辭
難獲乎上而無言不酬信乎下而無令不順有得於平
易近民之道者固如此及其為民立命如機發矢往必
濟而後已此又仁者之勇也古語有云活千人者其子
孫必封况全活至數萬衆等而上之又豈止歛惠於一
郡而已哉集風謠銘德政儒者事也不敢辭特書以誌
於太史氏

慶元路達嚕噶齊伊嚕通議德政記

東南負海之郡明其一也邑於海之島者其一曰象山
沮如斥鹵土而宜稻不三之一故其民貧正供之米視
所出而輸水行則渡東宿沿而北寄命於一葦之航風
濤盜賊俄頃不測山行則道寧海迂而東扶服數日之
程傾厓峭壁與豺虎出入幸而達則注香漉酒相賀不
幸而厄有司抵其贓而罪之其難有如此者通議大夫
伊嚕公之來閩郡乘察地險謀及同僚嚴禁苛取痛撻
冗費聽民隨米直準弊上送於路官自任責民不與焉

方且鈎摭吏欺籍之以補來歲之入審於上司得請既
揭示邑市數百年夙弊一朝而革旋倪聚觀懽心泉湧
向也艱阻之間期會之下生死罪戾凜乎在前今而衽
席之以子孫百世亦仁矣哉古者甸內之地所納總銓
秸服以至粟米量遠近酌重輕無毫釐不遂其情自唐
虞而三代所以為生民計一用此道然事有因革地有
險易物有懋遷泥乎古則窒因乎今則苟權其宜以便
安其民其殆庶乎此近民之官所急先務而公力行之

公私不交病古道在其中矣蓋公為政本之以仁暢之以智專心一力亦曰吾盡吾職而已而民自不能忘也一仁劑量環千里六邑咸被其惠斯邑也德之為甚邑宰高君珪采士民意狀其實屬余曰仁政大人所樂聞山林遺老其言必公敢以記請余謂賢守貳有德於此邦也孔厚是不可不書奚敢辭聞高君之入仕積有善政今宰斯邑仁聞益都是能以賢守貳之心為心成其美於下其亦可書也夫

重建西壽昌院記

郡乘於城南一里而遙有院曰西壽昌甲乙住持宋嘉定間廢於火而民家其基近六十年淳祐初僧慧通於篠城北隅結庵曰西來而揭以壽昌遺額意則有在今至元己丑凡廢刹皆復此其一也於是民徙之去基如舊嗣慧通者志堅領庵之僧志西如鑑善乘汝州分庵之田半資以辦事乃薈乃滌築垣以正限界度地定規模首建方丈次法堂開八年佛有殿僧有堂懺有所門

高而敞廊深而靜庖帑溷溷皆具而庵以其額復於院
初意得矣志堅耄而志西承之力狀其本末求記吁天
下事創之非難守之為難復之尤為難世之人連雲棟
宇厥先祖父之所經營所付託天變人事之不測不幸
而瓦礫而蕭艾至有委之不顧況於復乎慧通越人也
於壽昌非有巾鉢舊遊之戀而惻其久廢屬其意於方
來甚於天倫宗嫡之傳授遺繼志安問艱難勞苦必復
而後已然則學佛而如此用心豈徒空也哉王荊公謂

失之此而彼得之亦有感於斯云前進士陳著記

本堂集卷五十一

欽定四庫全書

本堂集卷五十二

宋 陳著 撰

記

天壽保國接待院記

佛氏教今為最盛明素多甲剎而次第新建者星羅棋布聯絡諸山氣脈以便其徒之居之遊為無窮地天壽保國接待院住持大遠其一也大遠越之上虞人俗姓

竺受業於里中澄然院來明掛單萬壽寺初其家撥水田五十畝資其行積之久而有築庵志周遊至鄞塘得王姓屋數十楹并基地一十二畝面勢爽豁山川平遠為香火道場可矣聽所欲售直以酬乃扁曰積慶像諸佛起三浮圖近遠歸嚮凡百祈求萃焉因所自有之資推而廣之為田三百七十畝有奇內捨一百畝入萬壽助經用餘則為本院直下子孫甲乙住持接待往來之計既而大遠上其事僧錄司而總統所總統所從所請而

改今額其有公文作証吁天下事其用力也一則立二則跲其計慮也密則周疏則憊大達自祝髮不以已自挾即志於創建而竟其成不忘所本即樂於施捨而無難色以若所為日以恢拓其事正未可量是可記已書來以記屬曰大達本儒家子而從釋斯請也幸勿辭余亦感其言外之意乃為書其概

延清堂記

里董聲仲家班溪面受南山霏翠腋挾烟林流水佳境

也門之外其祖手植雙檜餘陰滿堂而堂未名他日過
余請焉授以坡公詩中語曰延清因謂天地間卉木隨
人所取春風艷冶與蜂蝶爭旦暮粉兒乳子事耳惟檜
與松柏同清蒼然秀楚囂俗不得而親故獨靜虬然偃
蹇巧匠不得以材故多全筋骨瘦緊有鐵石心丰神嚴
邃有法家拂士氣非歲寒人難為交若而能對越舊物
切己體認以自玉則名斯稱然世變不齊人心無常一
有間斷如檜何如先世何此又方來所凜凜聲仲聞之

亦為之動乞終所教迺申之曰敬而已敬則為有檜有
檜則為有祖余嘗訪毗陵獨孤檜蓋及為刺史時所植
邦人德其政尊之愛護之風霜千載猶一日况家傳而
守之已三世不失根本深固枝葉昌繁厥先意脈不在
茲乎出告入面豈獨孤者比余亦知若簡淡純實是能
敬以延其清者故為索言之其歸而語若弟君藻輩相
與為斯堂地庶上無忝所付託則余言為有助聲仲再
拜曰敢不敬聲仲名雷發君藻名林發余四明遺耄陳

著也歲強圉作噩陽月望記

至德觀記

道流以虛為宗自謂十洲三島五雲樓閣其家也秦漢
方士入海而求貽笑千載夫地以人勝何嘗在渺茫中
耶鄞江之右古有鄮麓一聚喧囂塵外人道此則面之
去惟通妙師程德益知東可接鬼谷子肥遯之地西可
引四明狂客恬退之風前則羣峯拱揖鐘鼓聲出烟雲
杳靄間而龍山夭矯環抱其後有包氏遺居實擅其會

傾衣鉢資得之乃相乃度乃葺乃營始自歲辛巳曰殿
曰祠曰藏以揭虔妥靈曰齋堂曰方丈若庖庫湑溷以
起居飲食迄今二百餘楹皆備且買田已及三頃有山
可薪有圃可蔬猶曰有人焉地近斥鹵一井獨脈泉清
冽汲足之餘飲者憇者以賴殆天授也闕聞教所給額
曰至德觀他日圖且狀請記閱其狀有曰觀距親舍百
武而近庶朝夕便於省侍彼景物可人抑末也吾矍然
以知本喜昔懸溜山道士許邁立精舍為時節定省計

晉史為之立傳嵩高張道士以養親為韓文公所知序而送之以詩夫然則吾於德益安可不書蓋道非孝外物無孝則無道道家祖老子其為書未嘗不言孝世降而下為人子者有不能已為流俗之隨一彼之歸以誕為高以曠為達以周遊天下名山為得道路視其家蛻視其親飄然於無何有之鄉於孝乎何在德益乃能砥柱中流與許張相望殆將過之一念所質雖天不能違況於人況於鬼神三者觀門所恃以創立德益之道當

日以行觀之業當日以昌大安得不為發明其所以孝
以為出家者勸

先子所作至德觀記大德丁酉十月二十五日甲
寅日入時稿成時未燃燈不暇讀過明日即寢疾
此手澤之絕筆也嗚呼痛哉痛念先子孝行貫堅
質幽年八十有四未嘗一日不夢見父母每遇忌
日必涕洟終日語及膝下事必哀慕不已故臨終
之言發而為文亦不離乎孝然未經竄訂恐不能

無誤漏如四明狂之下嘗得初稿未竟片紙自有
客字以先子平日作文不尚艱深譎怪亦或有客
字不敢妄益也真蹟別為寶藏謹錄副以對付請
觀者嗚呼痛哉男深泣血識

記事

書夢事付洵

余於壬辰九月十五日五更初夢身自東歸有兩夫肩
芝蘭二大盆又有一几左頓盆梅右頓盆蘭亦壯夫舁

之皆芳秀擢茂異於常見隨其後以行其前大溪水新漲拍岸湧激沾及裳履及門先考紫衫立軒廡上先妣冠帔自堂中出受余拜訖懽言軟語撫勞織悉堂肆筵甚設器皆珍好果餉稱之考妣對坐樂甚余亦抃舞踴躍其間既而覺有以洵妻黃氏妊將生告申刻乃得男則知夢其吉之兆也而芝蘭梅之入夢正與謝庭事合而元幼度者為第一人是皆考妣冥冥中所遺之意而平日所積之澤也因咳而名之曰庭元吾家其有後乎

十一月初四日之吉書授洵時余七十九歲矣

勸戒文

勸修祖墓目子

吾氏由台來為嵩溪大族南山之陰九世祖大府君墓在焉八世七世六世祖墓在焉諸子孫有不別墓者在焉盡山兩岡無留所為子孫者固宜全護其丘隴封植其草木以慰祖宗之望今數十年來一草不植一木不條其墓有陷者破者夷而侵盜耕種者出於水者相望

而樵牧必趨若世其業然嗚呼世之墳墓有不幸而無
後者尚有隣里護之豈意幸而子孫之多而使祖宗之
墳墓重不幸也嗚呼惟其子孫之多而祖宗之墳墓所
以重不幸也使其於而父而母而兄而弟而妻與子者
焉必不能忍於不顧而不思而父而母而兄而弟而妻
與子者果何自而來哉而抑不思今之不幸之墳墓即
前日之而父而母而兄而弟而妻與子者之所藏也哉
嗚呼然則遠者固宜近矣近者固不復遠乎夫惟不能

以不遠則今日之不為遠者計其不啟來者之甚於今者邪興心至此是用大恩今欲稱家有無率錢顧二封培其不治者錢有餘則留為立表墓石用所當立賞曉諭不得樵牧耕種犯者必會於尊長家庭訓之外人犯之是為盜當從公究治將見草木葱蒨墳墓有所庇覆子子孫孫不惟得指其地而為霜露之思而一脈之氣不索必將陰受其惠顧矣其毋忽

嵎縣勸農文

令告民以勤為本嵎之民當加勤嵎山多水淺其土瘠
土瘠故物不滋物不滋故種薄收種薄收故民多貧彼
富者食肥饒猶云不給今反此而不加勤可乎勤則瘠
可肥貧可富不勤則瘠愈瘠貧愈貧其何以生況宿麥
慳長夏收未可知其早夜田野指準秋哉母不孝不悌
母不忠不信母鬪毆母賭博母訟訴母不納稅以取追
呼母輕犯法禁以召禍辱如是則農業專衣食足禮義
興矣爾父老其歸以告爾子弟

又

父老農繫民大命民而業農上輸官下贍家皆自此出
皆以為急又何待勸但天時不齊人力當盡令而不勸
是不職故去年勸以勸農亦勞止而夏而水而風秋而
旱而又水而又旱歲收不支歲用民良苦令憂焉新年
十日九雨而水鄉麥苗必多渰浸並水田畝必多衝坍
其脩爾隄防備而椿篠以捍以衛春雨既多夏秋必不
足低田車戽猶可及高田非有宿水如何救濟其鑿爾

陂塘浚爾硨厓以蓄以瀦各各用心勿云任天做事蚤
蚤為計勿臨時倉忙水旱有備三秋有成私可給公可
辦禮義可興獄訟可省令與百里可相安民之願令之
幸

又

令在剡今是三春本心為細民甚切及到催科上何曾
為寬得一分惟欲田里間力耕火種自辦得一分寬剩
輸稅外贍家口秋收接得麥熟猶可存活兩年以來農

家不是不勤入冬便無飯喫雖曰有風有水有旱是天時不順亦緣境內山多田少又多是大家所有細民能有幾何不過是佃種為生上熟時年或是贏溢才是中熟已不了主家租課今既連歲薄收如何不貧如何不窘幸得去冬三見雪白今年必是豐穰忍饑到今麥熟有日爾老者率爾少者壯者率爾弱者交相用力勿謂自家田便下工夫主家便任天得爾大家或給助或借貸交相用心勿謂佃家自去種田主家自來收租盡人

事應天時主佃皆有指望官司亦可寬小今日本是勸農併以為大家助勿以令言為過


檄

賞月檄

竊以正秋而告萬寶成乃人生之樂處明月不用一錢買供我輩之清歡茲季商三五雖南呂之及時然皓魄十分則視前月而倍色豈無好事者如此良夜何況少陵老翁有明年此會知誰健之語而牧之騷伯發人世

難逢開口笑之言安能局促自處覆盆要當慷慨相與
合釀越有勝境足款清光遠山近水如帶如簪俯地仰
天為幕為席大星無幾而銀河淡寸雲不點而璇宇澄
藥杵之聲宛聞桂花之香未減姮娥孤眠廣寒殿豈無
消息到人間老子同上武昌樓如此功名非分外使當
面挫過了恐噬臍無及焉合糾白水真人相挽青州從
事不妨衆共何惜十千熊燔鯉膾綽綽有餘豬肚鴨肝
多多益辦秋末之松青脆霜後之菊黃香雜然而前陳

皆自此中出院嗣宗一醉六十日豈不快哉李太白已
死三百年無此樂矣爾貴介公子及諸老先生皆有擢
兔穎之才總是步蟾宮之客氣若大鵬出海量如長鯨
吸川開錦囊而貯詩卸葛巾而漉酒式歌且舞縱意所
如百罰金杯亦不辭更把花馬金裘將出喚一年好景
君須記誰謂瓊樓玉宇不勝寒故茲檄聞仰祈鑒在



本堂集卷五十二

欽定四庫全書

集部

本堂集卷五十三至
七

詳校官庶吉士_臣李傳熊

主事_臣呂雲棟覆勘

總校官進士_臣朱鈐

校對官中書_臣高中

謄錄監生_臣劉坤

欽定四庫全書

本堂集卷五十三

宋 陳著 撰

檄

桂峯課會檄

竊以功名分內事敢辭桑硯之磨富貴學中來當效祖
鞭之着鎡基有素機會又新欲諧攜手之歡須斷同心
之利身慚丁白何時膺三接之榮指數槐黃此去僅一

歲之隔正宜勉力莫待臨期况麗則之技術難窮而粧
點之功夫無盡誰可人自為師家自為學要在得則相
善失則相規俾盡所長各言爾志白雪陽春人皆得句
高山流水行遇知音毋獨擅其已能冀相忘於下問其
來漸矣聲名盛同里之揚以數考之事業應吾儕之奮
自今以始願締其盟

菊集所檄

伏以天荒地老共偷萍世之餘生露白風清當為菊秋

而一醉眠累年之成例踵九日以為期亦知此時非復
疇昔戰戈凜毒膏草木以皆腥劫火飛熖烈山澤而如
赭雖欲少延於佳話何從更覓於孤芳誰謂靈石梵家
獨似武陵仙洞青壁丹崖之下風物依然蒼松翠竹之
間霜根好在且吾里雖經多事而我輩尚能自持儒衣
儒冠儼典刑其猶有鄉規鄉約矯禮義其無愆不妨投
暇以夷猶且將與世而酩酊而况黃有正色金鈴金錢
之在前白無纖瑕玉盆玉毬之布列楊妃粉紅者千葉

順聖淺紫者大葩豈在多乎聊復爾耳人生能幾百歲
調強作於千年花開便是重陽香豈衰於一夜拖筇洩
烏挈榼提壺奚擇乎清聖濁賢奚分乎彼賓此主食夕
英如靈均叟心漱楚騷受寒華如淵明翁眼空晉俗或
圍碁而開局面或彈琴而寫古音氣唱則吟洗每恨無
錢之句調高則唱和多情破帽之調有蒲團可以供醉
眠有桐魚可以即歡舞相與樂此能無從乎牧之挿滿
頭歸誰肯灑落暉之泪魏公下羞容淡要同收晚節之

香故茲檄聞幸以簪盞丁丑九月日檄

又

伏以須菊花滿插要酬佳節之難逢把茱萸細看曾問
明年之誰健忽焉今日又是重陽有前屢歲之成規用
後一日而為釀其羞俎豆以從樽壘時復一中之庶免
明月清風之笑人生行樂耳長記丹崖青壁之遊茲檄
星馳如約雲集戊寅九月日檄

榜

示諸生榜

人之為學實則名存矣不實而祈名可乎今之科舉實而失之者有之無失也不實而得之者有之非得也然則名在乎實科舉顧能為之得失哉而科舉亦豈為無實者設哉槐黃咫尺為學者盍亦凜凜中庸曰人一能之己百之人十能之己千之果能此道矣雖愚必明雖柔必強其不敏與諸生交敢以此為勉亦自勉也年月

日陳著示

嵯縣禁奪僕榜

本邑有一大怪事奪僕是也宅第要人使令當取情願
顧募養活得好投充自多今乃縱容僕輩奴羣橫行街
市鄉井力强即搏手便即挈或取諸販夫或取諸遊子
或取諸行轎之僕至有轎主中途而徒步或取諸荷擔
人力至有擔物與人力而俱無不問是何姓名不問是
何土著如狐兔遭猛虎如鳥雀遇鷹鷂一有叫呼拳脚
並至萬有脫兔皮毛已空魄散魂亡神號鬼哭家人聚

慟而尋訪道路竊語而涕洟不意清平世途乃有此等風俗若不嚴禁是無人心除多方差人緝捕外仍勒隅保責狀應有在於保內奪人者即救應即擒犯人到縣當正以掠人為奴婢之罪輕者刺鎖重者申府或隅保有顧忌不救應者連坐仍先申臺府

又

歲且晏矣奪僕之事又將發矣兩年榜禁幸諸宅第相體嚴飭僕從免為縣道之累今訪聞又有一等强悍之

徒呼傳引類結局裴套何曾為主家幹置不過是私下
詐欺剥脫衣巾騙脅錢酒小者受髮膚之毀大者有性
命之憂至於途路不敢行市井不敢入真是無天日世
界奴輩做出怪事主家贏得惡名宅第如何不痛懲官
司如何不重治帖四隅官任責提督引四隅保結申巡
捉有一犯者本隅不到隅官保甲連以坐罪分四吏專
引每日早晚兩次呈比有無犯人先責重罪狀乃仰諸
宅第如兩年來自為禁戢奴僕亦是相安之道庶免後

日見訝仍先申臺府

勸糴榜

剡地大物衆年饑民貧自春及秋當職但有米者出糴
有錢者得糴不敢輕予施行幸而粗相接濟今為麥飯
將盡菜色尚多且奉倉臺行下以勸糴為急不免牒諸
總轄或以物色或以堙殷實品搭勸率各救本鄉又恐
因官司約束有以措數指價為疑惟聽便宜不要多事
見之榜牒此意甚明今乃聞有蓄積者反行固閉乞糴

無門民命危於一髮須臾不可復忍限自此月二十五
日各鄉置鄉場出糶限一日先具勸到數及置場去處
申仍不測差官點撞或本鄉有饑餓不起者有喧闐無
告者先坐總轄以罪次問上戶堙殷實之家仍申臺府
牒總轄仍榜諸鄉

又

當職自春及夏不捐米價所以來商販近日以來不免
勸糶所以平米價今日雨應期溪流泛漲米舟輻輳米

價可平乃聞商販相與為奸或密行藏匿或私洩出境
價值反增於前小人無狀不可復寬且引上諸牙販責
狀日下出糶違者並差官封樁官司自立價發洩仍重
斷枷示仍申臺府

又

近準提舉使臺行下專令縣臺任責勸糶以濟民艱本
縣遂以分委坊郭四隅諸鄉總轄急行區處已涉旬餘
未見以條畫相聞目今溪流淺澁客販少通所宜作急

措置照得境內上戶既多蓄積必富况價值已登有益無損不于此時力行好事縱有私藏終非善計生長此邦目擊歲事人饑猶已想不待勸尚恐其間未能深體此意痛癢若不相關在本縣不諄諄告諭四隅全在隅官諸鄉全在總轄協力究心奉行實政或有故違當照上臺約束密切姓名申上差官點撞坐以閉糶之罪所合畫一條且如後

一縣郭四隅通勸通糶委官提督就惠安寺置局

一二十七鄉一鄉上戶自濟一鄉管截通融總轄
任責便宜區處

一各鄉總轄勸諭有米之家目下出糶

一米價只照目下價值

一斗用百合升用十合

表

代湖南帥趙德脩

必普

謝除直寶謨閣表

南邦承乏深愧菲才內閣分聯遽頒成命奉明綸之赫

奕揆私分以凌兢

中謝

竊惟紹熙宇文不顯帝謨之作

慶元繼志聿嚴寶字之儲既莫重於貽謀宜不輕於寓
直如臣者本無能解惟抱樸忠自江漢以來歸遂塵簪
紱皆朝廷之過用何補絲毫忽叨維屏之除已甚負山
之懼有華斯職復畀之臣襲寵稠重豈尋常之夢到通
班清切如咫尺之威臨靖念倖僥逾難報稱茲蓋恭遇皇
帝陛下雷霆英斷天地仁心丙夜以思謂三湘之襟要
未冬之警痛百姓之瘡痍爰假借于恩榮俾布宣于德政

臣敢不勤而補拙廉以持平分寸所為當不遺於日力本
根既固或無慮於風寒

立太子妃代前人賀皇帝表

宸扆詒謀妙選星儲之助昕朝授冊具瞻天合之姻家
法增輝坤輿胥慶皇帝陛下仁深翼子規遠承祧搜襄
邸之聘儀欲光前日思慈憲之遺範究在後人斷自聖
衷儼于貳極臣叨符遠地矯首盛儀佐饋禮嚴遙想龍
顏之動喜傾葵心切竊因虎拜之揚休

公主下嫁代前人賀皇帝表

天子之命追念東朝王姬之車言歸外館明時盛事同
宇歡聲皇帝陛下化始家齊愛隆巽長謂周邦之元舅
未遠流芳訪漢學之小侯允能濟美遂諧選尚無忝承
榮臣側耳國昏麋身郡寄秦簫天近想不逢長樂之歡
湘瑟風清謾遙上平陽之賀

代資政殿學士提舉洞霄宮王伯晦焞辭免大學
士知慶元府得旨謝皇帝表

具臣去國方無地以逃誅峻職奉祠乃自天而渙渥安
榮兩極感懼交深中謝伏念臣愚而信心方不宜世平
生知分敢萌進用之私獨立無朋惟恃遭逢之眷屬龍
德御時之始訪虎闈侍學之遺嚴莫敢辭狎除何亟踐
更二府曾何補于秋毫荏苒三年徒自警于日隙是苟
容而無恥况多病而早衰不疑遂行非敢為激然而宸
衷繾綣顧追路以趣回星使便蕃至臨門而強起真忱
盡于仰籲聖聰久而後俞猶分書殿之華俾忝制垣之

寄念骸骨乞歸而已晚莫贖前非豈股肱執政而不能
乃堪他使循墻而走賦廩以隨領鼠垞之上峯既叨厚
養寓龍圖之東序不改崇班轉外任之勞而使安赦屢
違之罪而加寵重于瀕瀆祈此異恩茲蓋恭遇皇帝陛
下大包兩儀明照四海察臣肺肝如見聊欲存出處之
宜憐臣膂力既憊已難責扶持之效曲垂大造全護殘
齡臣雖伏田疇不違帝里孤忠投老依然戀闕之至懷
一德致平矢此愛君之素願

理宗原廟章熙殿成代前人上皇帝起居表

聖謨如在貽燕翼以無窮邃殿崇成煥鴻名而昭揭式

彰孝治不顯前光

臣某中賀

恭以理宗烈文仁武安孝

皇帝立極繼天觀文化下令聞不已盡周王敬止之忱
多福允懷軼漢帝猗歟之美永言弓劍之閔緬想衣冠
之遊爰飾室楹用章景鑠恭惟皇帝陛下思皇繼序適
駿有聲日月就將陟降之監有赫夙夜宥密儀型之典
作孚思弗釋于羹墻美時歸于宗廟

臣云云緝熙維清

雖莫預肇裡之禮肅雖顯相第益嚴對越之心

本堂集卷五十三

欽定四庫全書

本堂集卷五十四

宋 陳著 撰

牋

立太子妃代湖南帥趙德脩賀皇后牋

椒房篤愛莫重承桃穀旦盛儀式嚴受室化由內始聽
自外孚皇后殿下身示母儀性安女則親親之義雖密
體於上心子子之慈為早謀於中饋遂諧嘉禮無忝徽

音臣何幸際逢難名鼓舞分符遠地阻隨振鷺之班歸
美長秋願續闕睢之詠

代前人賀皇太子牋

前星色正有開主器之賢吉日良辰樂得友瑟之懿事
闕家國喜滿乾坤恭惟皇太子殿下雷默其聲海重而
潤方春秋之鼎盛厚養德心在朝夕以常勤急資賢則
天作之合民具爾瞻某濫守專城欣聞嘉禮望而稱慶
莫輸鰲抃之情持以效芹敢頌雞鳴之訓

公主下嫁代前人賀皇后牋

后德始基夙著順成之則王姬下嫁聿嚴往送之儀邦
國增光宮闈胥慶皇后殿下美超虞汭聖比周姜備坤
道以承天陶然和樂協弼文之得女範以肅雍茲厭翟
之有行繁闕睢之所教某濫為郡將莫幸館甥遙想長
秋喜新副玉鞭之選對敬華旦愧莫隨金闕之班

代前人賀皇太子牋

分尊月姊既諧築館之盟義重星闈特侈及門之送禮

嚴內外喜滿乾坤皇太子殿下友則因心師惟主善與
家人而相接素篤天倫事異長以彌恭自融春意爰迂
鶴駕以相翟車某濫守南州遙觀上國重光下燭應聞
縹緲之吟簫盛事難名徒有回旋之舞袖

代資政殿學士提舉洞霄宮王伯晦辭免大學士
知慶元府得旨謝皇太后牋

老去清朝方疊辭予寵命恩除真館仍峻陟于寓班榮
甚踰涯懼如臨谷中謝伏念臣一迂成癖多病襲哀豐

水燕貽偶玷舊臣之近列乾天龍御首詢潛邸之未從
飛屢詔以趣來躡衆賢而驟拜偏儀兩地坐閱三年愛
君雖積于至誠無裨聖德憂國徒勞于補過難用拙謀猥
素飡而自慚凜公議其可畏東歸遂決上眷彌隆四輩
臨門但循牆而走避六旬淹命正席橐以待誅俄畀制
垣具升殿幄念初心非矯方當省咎以閉門使外任可
勝久已承恩而造闕亦惟控免雖幸賜俞然猶因除職
之恩而復子祝釐之秩不能者止既終察其無他惟適之

安又必使之有祿曲成至矣頻瀆可乎茲蓋恭遇皇太后殿下配聖母任垂慈子舜坤元柔順相與浚忠厚之源家法儉勤深有助廉恥之化迄今閑散實戴生全臣敢不仰體優容退矜際遇山林本性雖已從招隱之盟臣子至情尚欲播思齊之詠

狀

申兩浙轉運司乞牒紹興府并牒全府復回受魏彭獻嵎縣已沒入縣學養士田產并根究魏彭

狀

照對本縣

云云此下脫爛三十餘字

三百近年以來又置學

云云此下脫爛

三十餘字川泳雲飛予作成之下教亦至矣而區區猶有所

望者以養輔教今載忽承本縣以魏彭詭寄張總幹戶

產穀租五十餘拘入學宮添助養士可謂機幸不期魏

彭計會逃寨假借名色欲行強據繼蒙申上閭府而大

帥大卿先生以上代儒宗身衛吾道一覩此申即奉使

判所至州縣惟田既入學養士不可投獻勢要之家亦

不當恃勢而賤士今所申魏彭詭寄在籍一應田產已歸之學揆之法理而宜參之輿論而當有受獻者不亦愚而貪乎案結榜其使榜一下交相慶抃自謂可以垂無窮矣今之收歛之際其魏彭尚敢狐假全府威勢脫經本府追索人案又且帶兇徒脅持佃戶使租課未有歸着學官之興廢教養之絕續盡在此舉欲望台慈特賜山判近而申臺府遠而申朝廷將魏彭追上根勘妄訴投獻情犯重斷施行事本縣證得上件事昨累追到

魏彭為本主張制參太博宅縣尉幹人蔣升訴詭寄田
產偷瞞稅賦避免役次及私將先制參侍婢首飾衣物
釵釧藏匿及將庄內所留財穀什物租簿契書般藏一
空等事責據魏彭親書供招前項情犯某書注主之訴
僕名分為先財物為末魏彭父子執役于張縣尉宅已
二世矣張制參大度包荒養盛溫飽之計張縣尉因循
信任積生漫侮之心主家不加富而魏彭之家日以豐
主家不植強而魏彭之氣日以旺此張縣尉所以不平

因其擯妻而為之詰問其一家之私因其藏附摘發十
年前之事因其般家而為之空取其什物儲蓄之餘此
訟之所由起也有如附子等物縱是魏彭之父魏榮收
之于趙養娘之歸篋當窮其原于魏榮而魏榮已死當
訊其實于趙養娘而趙養娘在遠勿論可也有如般去
餘物便是主家可取亦須經官方是正當今乃棄一時
之憤為席卷之謀不知魏彭預般已多其實主家所般
無幾我自是欠占便宜彼遂以盡取之說為說若夫魏

彭寄托去處各有姓名不欲滋蔓追呼騷動田里勿論可也然魏彭自有不可逃之罪者三僕犯主怒惟有靜守今則輒先般動以啟主疑是為背主僕受主訴惟當和解今則買使旁譟以撓正事是為抗主此一可罪也小人得妻不啻足矣主家以婢妻之當相守以老衣食稍充眼空便別遂為阿蔣反目至曖昧奸情此二可罪也詭寄戶產條法甚嚴顧乃盡其家之所有以總幹為戶謾官避役不知幾年矣此三可罪也積此三罪他何

必問魏彭勘杖一百寄刺鎖長樂寨所有魏彭產業特與除墳墓基屋外並照條沒入縣學以助養士其張縣尉亦自謂中間亦有幾項然無干照可證況之縣學亦是本色上義事縱有之不當較也所有魏彭契書牒發下錢糧官廳據官籍并量入學所有魏彭寫下認錢約四本據面問張宣教及蔣升供隨已扯毀仍再取蔣升狀附案此後執出不為用也阿蔣不可復合聽歸主家餘皆免問仍申臺府本縣已備此因依分申提刑使臺

提舉使臺使府併申轉運使臺去訖續承主學徐迪功
公狀申魏彭倚恃親情祝祐譁訐不忿拘田入學養士
輒代名入府投獻勢要府第經營霸佔圖得脫免蔑視
學舍欺凌縣道乞備申本府給榜繼具申去外再據張
縣尉當直金華訴魏彭萬四憑託聲勢譁徒祝祐季二
把持打見成狀草欲將已沒入縣學養士田地投獻府
第繼拾得祝祐親筆狀草經縣蒙備申臺府去外續蒙
本府安撫使判所至州縣惟田既入學養士不可投獻

勢要之家亦不當持勢而賤士今所申魏彭詭寄在籍
一應田產已歸之學揆之法理而宜參之輿論而當有
受獻者不亦愚而貪乎案給榜其魏彭反投身於全府
作使臣埋頭經府託詞稱欠咸淳五年本息送主管司
追究理還帖下長樂寨勒魏彭供具因依其魏彭父子
三世為本宅管莊出入錢穀因此肥家只緣騙盜主家
財物不分名分不得已申訴魏彭在縣供認今魏彭既
已逃寨方且投托府第撰詞脫判乞施行某書注照得

魏彭之產詭寄犯法拘沒入官既歸夫子之學宮已從
本府而給榜全府方此享吾道之效正當為吾輩之地
必不肯聽魏彭之歸投奪夫子之所有本縣備此因依
具申本府去訖累牒長樂寨押上魏彭到縣取呈寨典
軍頭求壽等受財妄作緣故脫放魏彭未暇究竟今魏
彭黃緣計置投獻府第必欲脫隱本府給榜按牘必欲
追索人案某念縣庠所收甚薄欲教無養魏彭有不滿
三四十畝府第基業如山如河既不必較此微末詭寄

戶產拘入縣庠名正理順亦不當更來攘取今又據縣學諸職有詞所合迸還前後案節申上欲乞提學轉運使臺使判嚴欲追上魏彭根究妄行投獻情犯重行斷治仍牒本府住行并牒全府照應更乞備此因依申上朝省乞施行則闔邑人士實拜教育之造須至供申

申諸司乞寬催科劄狀

某不避斧誅仰干崇聽某縣令也有民社焉敢以其職事白照得本縣自去年風水旱交病上中戶薄收下戶

入冬便無飯鬻家產賣妻孥延引命脈專待今年蠶麥
接濟又危於淫雨苦寒蠶無成麥收不及半鵠形菜色
忍饑種田五月之交又晴乾類不及種十四日以後得
雨種方入土而日日是雨自二十至廿二日雨日夜如傾
嶁會三郡衆水環境莽為一壑侵齧縣堞冒沒民廬坍
壅土田漂蕩物產苗已秀者着泥而爛秧方插者隨流
而浮黍稷豆麻皆成烏有某子近縣二十里內雖典質
辦錢多差人船載飯往餉于二十七鄉雖百端勸諭或

發糶或運糶而饑民重遭此變夏作已缺望秋成亦難
準勸糶者有限待哺者方長事勢至此何至痛哭而已
惟是催科一事某為見國家調度非民賦何支非州縣
誰辦且版曹使府專吏專人更發迭至坐而煎督不能
以刻未免掇出文引嚴行追監而催到上戶那能及數
率是典質借兌以應期限皆專人所目擊彼下戶饑餓
而不能起者則奄奄氣息曰我死無須臾矣惶恤其他
扶曳而尚能行者則纍纍至庭曰我抱追引在此一惟

所命當此之際雖周孔之聖不能使之樂輸雖桑孔之
術不能為之追取繭絲保障自有後先天命人心亦相
終始不亟圖之有難言者為今之計欲寬民在寬縣催
欲寬縣催在寬使府戶部欲寬使府戶部則在朝廷然
此情不得上達惟有哀籲仁造欲乞恕微官僭躐之誅
察國事關繫之重備中朝省先乞行下使府戶部權寬
限措暫抽專催使某鞠躬盡瘁拯援摩撫活得一人是
一人活得一縣是一縣某下情不勝激切埃命之至

自注

云亡寬五六七三月催科仍自措辦十分之三以應公供別又有申狀今不存

嵎縣遠迎賈平章似道歸紹興私第狀

門生具官陳某右某恭審密啟紫宸薄遊綠野太平之期當今日成功收斂而若無富貴子我如浮雲隨意往來而自在父老望塵而迎拜兒童騎屋以聚觀某試仕非才除途有職喜溢衆人之外驅先百里之間即遂岩瞻允為機遇謹具再拜中伏祈鈞察

本堂集卷五十四

欽定四庫全書

本堂集卷五十五

宋 陳著 撰

啟

謝解啟

寶祐三年己卯十月一日

伏覩使府九月十二日揭曉叨預薦名者伏以鳳縉春
頌喚起功名之念鶚書秋送獲陳詞賦之科果誰主張
有此僥倖竊以聲律之學器識所充雖鋪張之體因今

亦惟鳴道自選舉之法非古猶足觀人奈何尚氣骨者
易失之粗拘繩尺者每流於弱天下誦在銘賦能幾希
文夷狄呼長嘯公不多范老挽回前作正賴後來第如某
者骨相郊寒性姿參魯鄉鄰相目頗知弓子之為箕塲
屋驚心殆類竚門之鼓瑟因束書于湖海將問道于雲
霄闖要家而巧顏情底難藍袖指戎幕而寄名氏便可
鵬冠然念受父師立身天地昂然當如獨鶴潔不可污
詭而或獲十禽得亦猶失茲遇詔歲來歸故鄉崢嶸折

桂之痴掀舞蹈槐之勇八吟雖苦愧無五色日之長一
鳴而驚忽借九萬風之便靖言至此夫豈偶然茲蓋恭
遇某官馳驟聖賢湛酣今古挈程周正心之印以覺昏
蒙任羊杜方面之權而先教化遂使雕蟲之陋亦叨勸
駕之榮某敢不益自激昂思所報稱由科目而進幸途
輟之方開以道義自將尚門墻之不辱寸丹如炳點墨
非誣謹具啟事躬詣堦墀趨謝伏惟台慈俯賜監念不
備謹啟

謝監試東倅趙叔元希愷啟

某官肩拍閒平眼空賀白定力泰山之盤據坐鎮棘闌
平心淵水之渟涵揭為藻鑑遂令弱植亦與計偕

謝西倅余景初岍啟

某官黃鐘為宮元圭不琢屏星臨照增文宿之光華松
雪吟哦長儒林之精采

謝南倅趙元禮染啟

某官東箭竒材南金上瑞煥炳星之聞望鎮服介藩分

魁秀之光華衣被多士

謝某教授啟

某官昭漢魁杓瑞時奎壁教如化雨轉吾道之洪鈞筆
補天功揭斯文之正印遂使子衿之末亦叨賓薦之榮
答某宰招鹿鳴宴啟

藐然末薦知百里之有天戒以初筵愧一寒之非地手
捧書魚之寵心馳笙鹿之榮退紱冠裳進陪樽俎春風
借便儻采及于菲葑他日歸思皆種成于桃李

謝江西蕭帥逢辰舉從事郎以上啟

舉詞云學優而仕行稱其文

開慶元年己未十二月廿二日舉景

定元年庚申三月謝

螺水名區聳碧幢之初建鷺洲冷職叨翠剡之先飛雖
公猶私以榮為懼天下多事之際帥府宏開江西一道
之間人材森立凡智謀足以應變與意氣足以赴功當
入禮羅以膺薦墨乃若執經講道周旋惟有於佩衿捧
檄馳驅搜訪不遺于文字縱或其人之可取疑亦非今

日之急親儻首舉之能無議者况某山癯特甚書癖相
忘俯仰兩間識此身之為貴上下千載求其志以未能
正宜入密以加工難免為貧而干祿幸記誦紘之地共
陶禮義之天庶取勝於他官仍不離於本色而况廬陵
氣習皆四忠薰染之餘古心規模存二程源流之舊吉州
白鷺州書院乃江水每升堂而自慶信筮仕之多緣有
心右丞相萬里所創如達尊實主吾道樞趨函丈既同立雪之諸生奔走鳴
珂又忝承風之屬吏苟特原於瘼曠是已拜於全存孰

謂屋烏敢希表鶚羽檄方棘宣力封疆者多機籌貴深
悉心帷幄者衆皆望華褒之積以開榮進之階送上公
車顧先書院魚味言之太過想輿論之交驚仕未學而
可羞豈優之謂文與行而俱慊何稱之云不圖叅谷之
忽春如嗜昌猷而莫曉特達如此激烈若何茲蓋恭遇
某官諸葛之忠子房之智毀家紆難寧誇着綉以晝行
應敵如常坐使聞笳而宵遁且欲共扶于宇宙方將泛
採于材能遂畀安庸亦歸造化某敢不端於取友善以

為師受蕭鄧侯國士之奇尚期不辱誦陳師道主家之
句舍此誰依歸倚良深敷宣罔既

通賀吉守寶謨王直閣

必

兼江西倉啟

恭諗簡在冕旒榮兼麾節江西一道之寄樂得真儒天
下多事之餘共扶新局除音誕布有識均歡恭惟某官

元氣會歸純忱表裏相門積累至東萊而愈光

呂成公
祖謙乃

夷簡之後今王敬
巖乃宰相淮之後

道學彫零幸中立之猶在思昔淳祐

之盛際滿朝慶厯之名臣某諸最賢則在部省

自注云
王伯晦

諸公及異日之勇退惟我公之獨先方當清明猶不能容

于范老設遇姦慝將大可觀于元之用則負漢廷蒲諫

之聲舍則遂洛社菜羹之興從容出處輝映後先易轍

改絃忽值公朝之籲俊彈冠結綬率皆曩歲之同寅或

掌儲察

李解峯
伯玉

或居小宰

王伯
晦

表立有如於汲直彙升

宜首於周行天子曰嘻此南風之不競敵氛乘隙半內

地以皆驚康廬庾嶺之中間湖漢洞庭之左右

江西江
在漢謂

之湖為禍特甚尚忍言哉興袁等區渺清野而未復瑞

漢

臨二郡慘焦土之可憐縱有幸逃蹂躪之衝亦皆重困
應酬之役起瘡痍而衽席孰思勤斯轉離散而室廬誰
主張是敗碁正需于國手壞症必待于神醫豈不欲鸞
鳳之儀庭其如為馬牛而擇牧爰授皇華之轡而分皂
蓋之車救浙東之大饑為今朱子安河內之甫定若昔
寇恂庶幾民物之更生不負君相之妙選某山癯不韻
書癖無奇俛仰兩間知此身之為貴浮沈半世求其志
以未能偶隨鴈塔之羣遂忝鷺洲之長與朋友而講切

乃平生心有宗主以依歸尤第一樂良機孰啟正印方
新既幸囿於帡幪庶苟迓於曠敗乾坤如許恃禮義之
尚存山斗其徒非門牆而誰望

通兩浙洪漕勸啟

鵲袍重寄有大造以成人鷺嶼浮踪望伋牆而無路茲
敢因徐而見孟因趙德修而見之蓋將去楚以事齊為今日謀

亦平生願竊念某山癯不韵書癖無奇俯仰兩間知此
身之為貴浮沈半世求其志以未能正宜入密以修心

難免為貧而干祿幸托誦絃之地共陶禮義之天庶猶

勝于他官仍不離于本色游泳者衆方相與於雲飛數

學其間尚庶幾於日益俄而北道

吉守兼倉趙端齋與揣也越之餘姚

人時屬軍興守臣皆用土人故東歸

歸也東舟雖去如已之孤寒本不因

人而冷煖然而義之所在謀之貴臧解組而行既匪隨

司之職倚席不去又非事主之情于二者以皆難有一

焉而或可乃公公檄而訪遺書因得少償門下之私不

覺久滯周南之役舊巢好在雖不計于往來殘局重拈

恐重難于收放固當委甑而莫顧烏可指氈之我留豈
食魚而必魴改誠是也欲膏車而秣馬將安之乎亦知
世有于燕臺未信誰推于鄭轂遭逢知舊勞苦蹢躅推
說項之素心轉依劉之偕想魯門陳子更欲從坡老之
遊烏幕石生或者為昌黎而用向來聞此今倘見之茲
蓋恭遇某官天目高標雲巖顧望世忠不陞西平有子
余有臣家學相輝元方為兄季為弟實任宗主人才之
責况當轉輸帝里之時以至疎庸亦希識拔使美容池

上分生意于微根則松柏歲寒見終身之大節以此自信尚其知我

謝浙漕提領趙右選

與嘗

辟三石橋酒庫啟

檄留京輦幸逢膚使之建臺剡上公車俾與屬封之分局本無一日之舊俄有二天之新誰能挈提如此特達竊惟王畿轉輸之寄實兼酒所提領之權庫務凡六十餘雖張官而置吏課額以千萬計易施奪而爭民故析微利者類傷仁而張高談者多廢事必有精粗一貫之

學斯享道義隨試之功故凡任人猶在得士某山癯不
韻書癖無奇俛仰兩間知此身之為貴浮沈半世求其
志以未能正宜入密以脩心未免為貧而干祿幸托誦
絃之所濫司衿佩之盟游泳其中雲與飛而方化數學
之際日加益而不知忽公牒之有嚴俾遺書之汝訪不
覺久旋于蟻磨似難再顧于菟裘豈食魚而必魴不可
則止將舍烏而弋鵠吾誰適從敢圖當世之福星有借
孤宗之道地拔之忝谷俾以糟丘是乃生死骨肉之恩

安暇本來面目之問況文章如黃魯直猶屑坐曹而學
問如劉道原甘且典務今以謬庸而叨此豈其機會之
偶然茲蓋恭遇某官光襲殿蘭清標坡菊規模軒豁一
身為世之龍門造化幹旋隻手活人之鮒輟以至于盆
盜塵埃之役亦取諸詩書糟粕之餘某敢不心抱獨醒
德銜既醉陳執中監慶州之酒實啟脩程趙文子舉筦庫
之才尚微終惠拳拳歸倚續續摩編

謝湖南帥寶謨趙直閣必普
辟帥準啟

雲熏南驅執御在門人之後露函上辟備員諸幕屬之
中孤寒夙園于陽春造化又從于今日某他無能解獨
有遭逢子規尹生魏國不忘於先契人輕李廌坡公自
謂之能文比辭食菜之厨歸值踏槐之市偶收一捷少

副相期杜曲之夢何靈愛深骨肉

乙卯秋初德脩得高
郵軍借五里塘杜園

安歇吾在其館中德脩忽夢吾因首有窘急狀者力為
解脫之夢覺以語吾謂今秋必預薦且賀之甚喜是秋
果叨鄉舉之薦秦遊之扁良侈喜滿鬚眉

吾省榜到正在高沙
德脩因扁其館曰曾

桂若為仰答予知音亦曰永隨子環轍急謀寸祿暫遠

仍墻蹣跚奉檄之還解后追風之入馬馳塞上終合歸
翁燕到堂前依然話舊且曲為予善計因小憇于凍曹
其處盆盎之間雖非疊洗不求糟粕之末粗有詩書在
私意惟知轉身而盛心若曰濶子等而向上或者待時
俄逢王鉞之詔行相赴油幢之影動願以充籠而行冲
者良多猶未下車惟荀爽其先辟覆蕉偶成于夢鹿無
枝可着于飛鳥倍費幹旋始諧收置試誦箋天之語足
觀為地之難謂二千里而偕來亦既數月使再三瀆而

不遂黜無晶光公朝所以亟俞小已未知所稱恭遇某官
平行實地清到聖涯早得風雲眼遂空于四海初無涯
岸門自遠于雜賓茲專羊杜之權宜得石溫之助仍先
私容不曰非才某敢不緊緊受持惶惶點檢薦選人如
檣輩既叨趙元鎮之知稱先生惟魯門當守陳履常之
敬寸丹如炳點墨非誣

本堂集卷五十五

欽定四庫全書

本堂集卷五十六

宋 陳著 撰

啟

謝江淮提領趙待制

與書

辟蕪湖茶局啟

星節提綱合江淮之全賦露函辟屬收湖海之孤踪雖
舊門墻又新陶冶竊念某山之癯骨木之苦心秦郎之
一第偶然真成沐淥韓子之五窮隨我或至捩羹故繇

初筮以來每至半途而止有如江右歸自日邊旋欲回
舟凜風波之難測將謀易轍渺天地以何之方當跋蹻
之交適遇從遊之舊勇推鄭轂仰累烏羅遽飛剡于公
車俾聯裾于醴幕舉手謝藻芹之窟樂與蓮依托根在
桃李之場圓成瓜戍此係平生之發軔已勞大造之轉
鈞誰料今年宛猶前日春行湘水匆匆明月之船夜泊
秦淮炯炯寒燈之劍幸密瞻于臺治輒叨僂于坐隅哀
此數奇過于宿予一子司之選避百雉軌其紛拏侯喜

連遭分莫追于湜輩少陵漂泊自見厚于嚴公吹而上
之何以稱此茲蓋恭遇某官有大抱負做實事功位列
星辰乃執謙于下士才空宇宙不求備于他人遂於國
計之司存謾以書生而嘗試某敢不內嚴四畏外寬一
分荷葉雨中晏以身而自況菊花坡下趙公號菊坡終有面
以相從欲報之私此特其畧

謝沿江姚制使希得從叟前辟啟

化廬舊物冥心師造之歸權幕贅員轉手王人之辟飲泉

知脈指海銜恩竊念其伎倆全無夤緣獨到南宮濫第
實誤玷於公衡東湧凍曹又密依於大纛方有蕝天之
托遽從湘水之遊行或使之非所樂也去數千里戀軒
之夢孤飛曾幾何時出幕之裝已束擲芳芷以自媚抱焦桐
而何歸倚擢秦淮樞衣程生蕭蕭杜老非嚴公而誰憐
汲汲孫生惟范老其能亮既使安存于雲厦且將近置
於冰壺而一缺之補風乃多方而為地念歲月之擲至
每見于顏辭謂夏秋之交斷可投于機會遂使外臺之

公剡肯分南豫之子司羅石洪于洛陽雖從烏幕薦宗
師于袁相元是韓門靖而思之何以稱此茲蓋恭遇某
官學聖人事踏實地行泰山巖巖以靜重鎮浮俗洞庭
浩浩以寬平容衆流故好賢有甚於緇衣而見善必收
於夾袋至今蘧落重累幹旋某勉循塵容終懷本色竹
猶有節每欲賡居易之吟蓮不染泥當無辱濂溪之愛庶
其異日濯以清風

通淮西李漕副

伯玉

啟

望銀屏山燦皇華之禮樂隔衣帶水淒權屬之塵埃何
幸受容敢遲通敬恭惟其官三光正氣一片古心白屋
聲名已擅江東之獨步彤庭姓字曾開日下之五雲蓋

造物者篤生庶斯文其有屬其處鄉黨其位朝廷事而

當言以宰士攻臺諫

為左司時
攻蕭泰來

道之所在以達官下布

韋

饒雙峯魯也饒以趙庸齋汝騰沸伯巵漢
輩薦白身補官為本州教官饒州人

識見愈高

而心自平局量益濶而功轉密豈常流得而傍睨於前
輩或其並驅如坡老當熙豐之間動是不合如晦翁在

乾淳之際卓乎自全故居中無一日之安在外已十年
之久茲特使指又轉淮頭有所謂輸輓于芻粟何足勞
經綸之絲髮誠以民方復業正資清德之撫摩又敵虜
無常情實賴重名之鎮壓事任亦不輕矣吾道其有光乎
某材不如人仕而為學書堂着脚樂多士之相知醴局
垂頭噴衆人之皆醉轉就師幢之辟住從賓幕之遊魯
未席溫又催舟發帆過秦淮之潏止或尼之權留古豫
之津有難言者惟以獲歸于臨照尚其自慶于遭逢夢

寐粗安非但託連雲之厦平生大願終須立深雪之門
欲陳之私此特其畧

謝汾江制使寶章姚學士希得舉關陞啟

舉詞云奮從儒素有學有文見諸職業之間藉
甚廣勤之譽

惟大制府善舊物之受容以從事員先衆人而吹上此
雖公舉其實私恩蓋黃鉞鎮臨惟江淮其最大而青衫
趨走如溫石者良多皆有登龍之榮庶幾表鶚之寵其

如薦額不滿盛心故雖賢而亦遺豈非分而可覲况如
某者信迂為切嗜苦如甘六尺之軀欲先立其大者一
貫之學猶或困而知之自從初筮以來每懼半途而廢
詎謂今日失身異岐坐闕津而曉昏風雨弗易立商賈
而爾汝塵埃與交嗟嗟本色之非媿媿寒毛之豎然豈
獲已亦有難言老驥服箱終未忘于追電窮鱗竊水聊
自活以待時第思三刻之闕陞尚欠一函之噓送茲為
何地而欲求人自非有濂溪心識清蓮于淤泥之外具

老泉眼收峭木于荒江之濱宵削奏通以階進步茲蓋
恭遇某官棟梁吾道山斗諸賢大度為公種無邊之桃
李真忱矜小采最下之菲葑以至猥如催征亦不嫌于
橫薦載披華袞如復青氈為賤丈夫而叨文學之譽守
阿堵物乃辱廉勤之稱是皆曲借於齒牙可証本來之
面目允謂特達若而稱蒙某倚而為梯行可拾級選坑
未離尚隻手之挈提翹館相依有終年之植立其為激
烈固既敷陳

通江東提舉倪察院普啟

疏綽起家乘軺司庾使星在外暫迂魁下之三台元氣
無邊先到江東之一道光華所賁觀德是孚恭惟某官
天分賈高學力獨詣得三五六經之旨體博用宏羅二
十八宿于胸芒寒色正脚踏鰲頭之峻眼看鵬翼之低
人物如斯吾道幸矣結知輔展本難掩之聲名給禮玉
堂遂欲行其議論薄遊蓬觀勁上松廳風采奮張豺狼為
之歛避規模濶遠麟鳳得其依歸比勇退於急流如益

隆於上眷授之漢節馳彼周原激濁揚清當無毀譽之
偏徇興利除害亦有仁義之安行第恐追鋒又催荷橐
某山之癯骨木之苦心俯仰兩間知此身之為貴浮沈
半世求其志以未能遂遂南征勿勿東下艤客秦淮之
潞止或尼之權商古豫之津豈得已者茲獲歸于臨照
輒自慶于遭逢夢寐粗安非但託連雲之厦平生大願
終須立深雪之門欲陳之私此特其畧

通太平守江淮提領陸右撰

景思

啟

一扎起家雙旌戒道紅雲境界盡歸筆橐之舊班采石
江山暫借文章之太守先聲雷動喜氣虹騰恭惟某官
百世間生三光全氣點墨隻字重于換羊之書傑作雄
文真是搏麟之手故敬輿之家學不墜而放翁之祖傳愈
光粵遡紫霄備極清選策府呼為師古史筵稱為董狐
鰲禁演綸粹然西漢之體螭坳執簡蔚有貞觀之風以
至星軺外馳雲霧前擁常情獎精神而莫應孰爲特談
笑而有餘方且挾奎壁而行不為食烟火之語如小范

曲成于塞下何礙籌邊如大蘓詩滿于湖西不妨治郡
此當今第一人物于斯文為大宗師宜還帝旁增重朝
列乃領虎符之寄以臨牛渚之區波濤滔滔進而倣雍公
之事業風月洒洒退而續太白之吟哦豈不綽然裕哉
第恐行且召矣某山之癯骨木之苦心俛仰兩間知此
身之為貴浮沈半世求其志以未能逐逐南征匆匆東
下艤客秦淮之澌止或尼之權商古豫之津豈得已者
忽高牙之出鎖以小草而受容不圖遭逢輒自慶快

雖未忝程雪猶幸拜于馬前茲既託蕪天尚終收于門
下辦香良切尺楮奚殫

通淮西漕副范先生 丁孫啟

詔從卿月分任漕冰奎閣通班正色上摩于東壁輶車
戒道仁聲先到予西淮其行以時有識之慶恭惟某官
腳踏實地心遊聖涯秋江萬竹之清塵埃不染冬嶺孤
松之秀霜雪難移百年蜀國之正傳四海瑩齋之獨立
今為何日獨抱此天憂國方深遑恤無家之飄泊愛身

為重不知流俗之將迎有如大棘之除可謂泰茅之拔
且回翔其兩載僅勉強于一來敬輿之言慨忠本為唐
計長儒之氣戇直終忤漢廷扁舟甫遂于引還六轡入
從而臨遣亦思邊地尤望福星騎哨屢驚棄土膏于榛
莽鷗冠羣布視民命于草菅爰茲泰山北斗之儒以轉
和氣陽春之脈玉壺澄澈污吏望而毛寒水鑑平明小
人得以情白至於粟芻之飛輓特其土苴之應酬是雖
淹賢尚可行志某信迂為切嗜苦如甘五尺之軀欲先

立其大者一貫之學猶或困而知之正宜靜而用工乃
為貧而出仕放船湘浦携芳芷以胡歸分權湖陰顧窮
林而自悼汗顏甚矣本色謂何忽逢部使之將輸乃以
門生而受察形容雖穢已先濯于清風肝胆自明尚無
慚于異日其為歸倚罔既編摩

謝前人舉改官職司破白啟

舉詞云性質開爽學術粹明亦可儀朝何止為
宰

華轡驅馳方力行于古道翠函薦送乃首及于陳人雖
公猶私有感斯激夫五刻齊而換秩自是良規使一毫
出于徇私則為謬舉詎知洗滌迄至難言挾貴者善頡
頡遁神者巧旋幹揚揚班筍粉兒共其爭先坎坎選叢
冰氏淒其誑顧自非眼孔掃空于勢利脊梁拄定于孤
寒肯推此心先到吾輩某豈不苦學而無敏資門外乾
坤顧羽翰之雖短鏡中歲月懼毛髮之空哀遂逐宦塵
競競本色謂可少償於初志其如多厄於窮途俯役于

茲汗顏斯甚補苴日額坐闕津而曉昏計較秋毫與商
賈而爾汝自嘆失身於罟獲不復見齒於縉紳孰料汗
居實關奇遇如南軒取滋味于食杞勝供膏粱如康節
以根撥而見花畧去枝葉逢人說項草表薦衡

先曾以
科目薦

無片時置推轂之心將隻手為通閨之地幽鶯在谷意

遷木之有緣駭鹿藏隍奈夢蕉之隨覺屢孤大造益信

數奇

先生為理鄉時屢以削
換舉而屢為人所脫取

忽星節之此來殆天公之

有為建臺十日飛櫝九霄豈無他人宜得樓臺之先月

不忘此客乃攬簾幕之東風旁觀必議其僥獨見自
為之愧及披褒袞彌惕私襟塵土如斯乃稱開爽砥礪
而已顧曰粹明至言亦可以朝儀允足仰窺其用意今
此特達前無比倫恭惟某官學者泰山道之砥柱意響
所予雖宰相以莫私風裁自高乃小才而亦喜故予登
門之舊與夫趨幕之新有合權衡等歸陶冶某敢不從
頭點檢立脚受持春信方回幸獨破江梅之白歲寒後
見當常依雪柏之青欲報之深可陳者淺

本堂集卷五十六

欽定四庫全書

本堂集卷五十七

宋 陳著 撰

啟

謝江淮提領右撰陸開國

景思

舉改官啟

舉詞云致遠之器貫道之文可使立朝姑屈為
宰

師門多士誰無先月之心子局一寒獨拜西風之造載

披褒袞益駭私襟蓋器識如宣公之全是為間氣而文章如放翁之粹乃集大成於家傳而有光非墻仞而誰屬彼及門而窺堂與特撮土之于岡陵或忝過譽祇供羣訛况如某者梅枯猶活荼苦為甘摸索鈍根學然後知不足攜持薄技仕有時乎為貧撫歲月之忽遷噴塵埃之旋迫茲靡猥役愈失初心日額煎熬違及聖賢之對秋毫計較難行仁義之言所謂本色之何如自分時賢之見絕豈圖污處實啟竒逢如康節翁見花于枝葉之

外如老蘓氏取木于泥沙之中既引之以食魚之厨且
諾以薦鶚之牘其如孤注難應百需彼何人斯挾六丁
而下取是有命也揖五鬼而退安顧主以鐵做之脊梁
而敢以鼎扛之化筆終令反壁以踐訂金第材具淺疎
莫當致遠之譽語言拙澁曷勝貫道之稱矧云可使之
立朝倍覺所叨之非分茲蓋恭遇某官精神于水力量
如山乃人中仙有良方可以活國為天下法無隻字而
非續經遂於樞趨之徒借以成就之力但知酷嗜不曰

溢辭某念五舉員尚多捕影雖自今日後未知選弃之
果逃然從我雲西

先生號雲西

已與清流之至樂其為激烈

罔既鋪陳

謝門人江東漕副辟運準啟

翹館備員托根最後計臺辟屬揚粃在前信乎知己之
淺深不以及門之久近韓魏國平生之舊非獨尹洙歐
陽氏早與之交固多魯輩彼莘老本收於晚歲而子瞻
乃得之後來或謂其負經綸之材或取其極文章之妙

兩公異顧百倍先登如某者生而銅昏加之癖癩惺惺
點檢之學深覲前修矻矻披吟之功且成中畫亦知宇
宙自有宗師上可以叩吾道之指歸下可以為終身之
依倚迫貧奔走抱志蹉跎驚馬虺隤分不歸于名廐芥
舟漂泊終難近于仙山孰謂權征實闕機遇方進趨于
軒廡遙叨侍于琴書曾不曰從公之遲惟知有玉女之
速衆方爭食特存前日之菟裘誰不問釣獨拜西風之
鶚表一為之甚二乃得兼真後積之薪高頗自知其苗

碩俄逢易節雖預執鞭然賓客滿門皆有求于舉手使
父母為子亦未易以用情而况籌帷僅留贅闕彼百需
其莫應于末綴乎奚希過慮陶成復先剡置狄公屢薦
胡為終愛于東之黃忠驟遷能不見疑于關羽茲榮祗
懼欲報良難茲蓋恭遇某官先生國之棟梁儒者標準
文氣清于白傅歌舞之計本疎人望雅于謝公山林之
興尤重茲領竹梧之道院是為桃李之主人謂將揚激
于諸賢要且挈提于小物遂令吳下始忝盧前某重念

昨是何官今而此地依蓮泛水頓消濁宦之塵埃食檠
飲水永屬清門之造化私心自慶流俗寧知

謝沿江制使淮西總領姚刊書

希得

舉改官啟

舉詞云行粹而識融學富而文瞻贊籌計幕流
譽天朝

玉鉞重臣兼提餉節冰臺末屬遽被薦函彼其本幕之
最親胡乃它司之先及蒙非其分懼甚于榮竊惟趨走
之在前是固搜揚之在後然果知居易何妨僅舍于判

官而不舉康衡則為徒私于幕府此又取人之公道詎容執我之常程但如某生而銅昏加之癖懶惺惺點校有覩前修矻矻披吟亦成中畫浪挾南漕之券周遊下澤之車數年其間五考而近偶追隨于鵲錦或倚傍于麟垣回思脫選之難尚須三箭微福受知之素或就一陶第緣問缺之成遲深恐撫機而坐失詎圖造化特閔陽和任蹊李之爭春為野梅而放晚俞音天落晨趨外計之庭褒字雲香夕拜西臺之剡予之可謂特達受者

能無怛怛瞻彼司存紛其贊畫當戊己之屯方益而庚
癸之呼正殷勞于簿書送案頭之日月嚴于斯會散筆
底之風霜陳力相先而未涯舉員正慮其不足茲惟旁
睨無預前筭隣柵之有雞豚本難指認山居而食無鱉
乃副涎饕况披華袞之辭彌激丹襟之媿何學何識奚
行奚文謂之粹融豈硃硃之可稱謂之富贍非潢潦之
敢當至言流譽于朝益見相期于遠捧持異寵驚耀郡
觀茲蓋恭遇某官身植大公心勤小物念某竊奉常之

第實累司衡逮某需從事之員入分薦牘故欲始終其
陶冶盡捐彼此之藩籬遂令妄庸不一僥倖某自今而
後惟德是懷忝谷素窮敢計異時之須入橘洲清絕

先生

號橘洲庶幾晚節之相依欲報之私有言則淺

賀前人陞樞密啟

疇庸制府躋位樞庭事任徧更人謂袞歸之已屬老成獨
立上方柄用之未涯宗社有憑廟堂增重恭惟某官十
分地位一片古心喬嶽噓雲有靜中之變化平湖浸月

見寬處之分明卓然將相之才闢乎天地之運疇昔之
歲彼狂者胡橋上流而肆侵環中國而皆震戈舩溯險
巴渝之捷既馳武帳回鋒江漢之功誰奏乾坤再見于
澄肅神人共為之悅和皆一時判決之謀此萬世光明
之蹟便令進叅于鼎鼐胡為退服于帶裘坐鄒山堂兩
年秋好好轉清溪閣三度春香天下若曰迂途吾君則有
深意蓋今日中書之上相乃前時外間之元勳茲將培
植于隨規故亦回旋而授鉞而况從容自在素不兢于

急流簡淡為常本不求于外物維綽綽其餘裕雖遲遲
乎何嫌來則為之維其時矣夏卿入覲曉方叩于九闕
省府催班夕已登于兩地海宇相傳而歡忭公心尤抱
于隱憂善類雖不至遯駒而少英概姦朋雖莫能為蜮
而多宿根民生猶見其彫虛軍氣未聞其壯實邊聲暫
息虞飲馬之復來盜弄僅平慮揭竿之餘嘯乘國家之
閒暇為戶牖之綢繆夙學盡行中興可冀某愧非法器
叨入化鈞雖莫御于朝車乃聳聞于除筆平生依倚有

非流俗之能知正人登庸自是私心之至樂賀不盡意
寄諸無言

謝江東提刑華文孫直閣

子秀

舉改官啟

舉詞云詞藻清新才猷通敏付之民社必有可
觀

龍門未至適逢憲節之西鶚表上騰遽及計帷之底欲
逃榮而有素得機會以即偕誰能謀人如此着意彼景
仁館子簡肅終携以朝少游學子文忠卒薦之上蓋如

尋常之相與信其環瑋之不羣故力為之噓揚曾不謂之過當如某也藐焉弱植宿也鈍根讀聖賢書悵指歸其何在業場屋技問聲病以堪羞屬有黃緣獲陪光霽示以斯文之印引之吾道之門感鞭策之孔勤謂緒餘之可竊驚駘之乘望千里而不前鳩鷄之姿企九霄而莫上已分莊樗之無用不圖唐塔之偶題盍永傍于師墻尚曲成于宦學奈何薄命動是異歧角巾燕適于平泉某留江左蕩節驅馳于全淞某滯湖陰自憐初志之頓

睽亦豈盛心之所望遂祿而已反身謂何然而橫渠諸
生世自推其有禮歐陽之客誰復議其無文誤蒙當路
之賢狎畀薦函之寵是雖僥倖于他手其實源流于主
家孰料欠員更叨親刻梅花殘臘方攬轡花楊柳東風
隨飛袞字

淳祐元年己丑正月
三十日奏狀到院

燧爾才猷之謂清乎文

藻之稱豈不夙知胡為過譽猶嗜羊棗本非坐上之珍
亦曰猗苓曾是籠中之物及一朝之巧便副平日之至
懷急于為鼠而發機忘其抵鵲之以玉偉哉此舉甚矣

其難彼何人斯倚山為力方是時也執券取償非金石之見堅凝則毫釐之間差跌况嘗推原其故抑且解后之奇比如燕之辭梁已從此去忽如蟻之環磨孰使之來信積念之所鍾雖造物而亦應不然何以而得此哉恭惟某官任道以身薦賢為國十分春意每加厚於孤寒一片古心尤不忘于故舊遂從屬部首舉陳人某敢不謹謹受持惶惶黜校選坑欲脫特其流俗之常情實地力行此則終身之樂事欲報之德不知其仁

謝沿江大制使淮西總領馬觀文

光祖舉改官啟

舉詞云居官強敏律已清脩充若所為何止為

宰

大臣在外倚為吾道之宗洪造無邊薦及他司之吏內
揣躍其自賀旁觀或者未知夙志之諧終身之幸念脫
迹於七選之筭此特常情惟托根於大賢之門斯為奇
遇若昔子羽與吾元城受薦紫巖共主紹興之公議辱
知涑水當知元祐之全名進不負識拔之明退無慚講

求之素豈知桃李僅爭于春事蓋與松栢同傲于歲寒
某雖昏愚亦嘗憤排父師左右頗聞所學之指歸宇宙
中間欲免此身之愧怍庶全存其在我或邂逅以為徒
而今之人非古之道讀故書者劣事業名曰腐儒通時
政者無本根類成俗吏汨滔滔其如彼羗渺渺兮從誰
顧瞻四方突兀一老盡夤緣而御李以印信于仰韓然
而欲獻書如高彪恐貽自悔欲掃門如魏勃殆重吾羞
繇弱冠以到今懷辨香而無路謁來計幕巧傍樞垣不

圖際會之機乃在照臨之地既見君子恍然大夢之忽醒豈無他人此則平生之至願第猶拘于異事辱謂進以有時丈席之間曾未密承衡鑒之下胡為深信杞為苦硬之葉坡老所求蓮非富貴之家濂翁自愛遽飛臺剡為足京員雖仰認于緇衣而甚驚于華袞必霹靂手斯稱強敏之褒必冰雪心始副清修之譽有如不肖何以克當茲蓋恭遇某官學印西山

馬公受學于真文忠公

望標中

國古心勤物豈知時樣之新冷眼看人肯顧世情之熱

不動搖于重援

馬公本欲以制司削舉而此職司已足不可受遂以總領所削舉時賈相屢以

書脅求公荅以老且死矣此人不可失此削久已擬之不復他舉賈相遂止不眩惑于浮名

遂使孤寒獨蒙特達某駕言須入藉此可行宦海何涯

敢遽有水到渠成之喜師牆在上且獲從雲飛川泳之

遊

本在漕幕馬公來遂檄兼制司僉廳及舉員與考既足當趨班馬公意欲留連相與恐妨進取不敢言遂

為之留至丙寅冬始自得之餘他非所報

易昌化縣謝賈太傅

似道

啟

先注隆興府南昌縣會伯求弟蒙自衢州

除淮西總領避嫌申廟堂兩易浙縣入剡點臨安府昌化縣

兄弟私嫌方窘戴星之步廟堂公造遽從易地之申特
達成全僥倖遭際竊以餽邊之職數路受容避親之條
一家為始乃若名銜之不繫而于錢穀以相關情以圓
融則國家之事廢勢以扞格則手足之義傷守株可乎
易轍是矣然非妙回幹于化鈞之下洗拘攣于例簿之
中安得此時各從其便伏念某梅枯猶活荼苦如甘受
命父師凜兢兢乎本色授徒鄉曲淒冉冉其中年偶叨
雁塔之題獲玷鷺洲之長遂因聞道益自琢磨誤蒙當

路之見知狎上公車之辟置振衣岳麓拜揖南軒遺教之風回擢秦淮盤薄西山舊遊之地頗自矜予屢遇已皆出于一陶茲抱宓琴將趨齊戍仲氏忽叨于易節事權則任于餉師據其官稱淮西而已聞其財計江右則多而況南昌實負洪府上下相承接之際人情甚難形迹在嫌疑之間物議必及惟有他為之問路庶幾可免于觸藩爰自餉師輒投櫝請宣其多事急殆類于鵠原或者包荒兼愛推於烏屋累累衡平之聽曾無劍案之

疑惟意所求如響斯答鼯鼠勞千鈞之弩良駉旁觀蚍
蜉徙寸壤之封竟諧善避且唐昌之為邑乃周畿之附
庸竊于舊聞得其大畧山深俗獷輕生頗甚于他鄉土
瘠民貧艱食常如乎饑歲將具宣清明之化使相安迂
拙之規欲免曠瘼終歸垓北茲蓋恭遇某官忠扶漢鼎
順格舜琴謙避師垣肯以元勲而自處勇推相印第于
重事以難辭故以大公而聚衆賢若曰當今之第一義
苟利吾國雖平生異趣而亦親或犯有司無左右偏私

之為累以至塵埃之吏皆在權度之中猥使疎庸過叨
委曲某敢不仰懷恩紀退服官箴同氣黃緣幸已忝公
門之桃李初心學愛尚无慙山縣之竹松欲報之深有
言則淺

